

萬歷仙居縣志卷之二

山川

先王辯形勝以名邑蓋有取義焉仙僻且隘宜無稱者乃括蒼韋羌安洲紫籀諸山相錯如繡而溪水縈縠若澄練時乎千峯回翠掩映於殘霞落照之間方壺蓬嶠不在遠矣彼鑿山振屐選勝事者不稱此何耶請以俟考古者

馮師山

縣西二百十里舊傳馮氏女學道於此

界坑山

縣西一百四十里脉起永嘉重巒疊嶂延于安仁廣福之間

金峯山

縣西九十里峯有九峯次第起伏至第九峯峙以金星蒼翠鬱然

東山

縣西北五十五里裏山一名芝巖外山一名紫巖宋林放隱于此

萬竹山

縣西南四十五里絕頂曰新羅九峯回環道極險隘嶺上平曠幽窈自成一村落

韋羌山

縣西四十五里險絕難升上有石壁刻科斗篆文晉義熙中周廷尉領郡造飛梯以蠟摸之莫識其義後守阮錄攜衆往觀雲雨晦暝累日不見下有綠筠亭郭三益詩紀其勝

掛榜山

縣西四十里巖壁橫亘青紫蔚然

臥旗山

縣西北四十里峯巒偃伏如旗

穀堆山

縣西南四十里

翠屏山

縣西四十里蒼翠鬱蔥頗稱勝概

道赭山

縣南一百里道通溫州

張阜山

縣西北三十里

萬歷仙居縣志

卷二

一

仙居叢書

紫籀山

縣北三十里舊名竹山唐玄宗夢一人紫服而朝自稱竹山神來呈瑞鳳已而果有鳳翔遂賜名建廟

福應山

縣東二里陰陽家謂其居邑龍首得地之勝居人建浮圖其上自是青紫不乏有盡美亭蔣景修爲之記

放光塔山

縣北二里一名綵仞周顯德間僧德韶翔浮圖於上

安洲山

縣南五里一名九旬山唐武德中僧灌頂講經於此時山在水中波瀾四絕漁者甚衆頂勸止之忽一夕風雨大作旦則成洲矣萬歷間知縣汪夢說建塔於上又名新塔山

浮石山

縣南三里下有石屹溪中視之若浮

獅子山

與浮石相連

括蒼山

縣東南五十里高一千五百丈延亘三邑

幞頭山

縣東三十里

石龕山

縣東一十五里上有石室深三丈廣一丈相傳神靈棲焉

石籠崆山

縣西南十五里多巨石玲瓏可愛

靈山

縣西二十里以禽鳥不棲故名

項羽山

縣西五十里相傳項羽少時駐馬于此有石馬跡存焉

孟溪山

縣北十里

彭溪山

縣西北四十里

枕溪山

縣南九里

白巖山

縣西南十五里

三井山

縣北三十里中有三龍湫

沈海山

縣西六十五里其趾插海

赤城山

縣西七十里土石俱赤

曹官山

縣西八十里

石疊山 縣南三十里

玉几山 縣南五十里

圭峯 縣北十里一名青尖萬山四合此峯聳然特秀若王侯秉圭而立

南峯 縣南三里上有浮屠曰南塔又有桃花洞

蒼嶺 縣西九十里高五千丈周迴八十里險峻為浙東之最宋陳公輔詩云回頭却望重崗處得似人心險也乎

古通嶺 縣西北八十五里 **黃榆嶺** 縣南七十里

馬鬃嶺 縣北十里 **東嶺** 縣東二里

十丈嶺 縣南五里國朝王一甯八歲過此口占云帥手撥開天上雲五湖四海堪一望 **大峽嶺** 縣南十五里一名峽山

界嶺 縣東三十里 **五部嶺** 縣東一百五十里

三十六岨嶺 縣西九十里 **周觀巖** 縣西八十里

景鳳巖 縣西南七十里 **天柱巖** 縣西五十里

飯甑巖 縣西四十里 **水簾巖** 縣西南四十五里懸瀑如簾下有石室可容千人六月寒侵肌骨

景星巖 縣西南五十五里上有鹿景巖旁有一穴幽深叵測投石有聲名曰響巖宋吳芾詩云天近雲隨步林深翠滴衫國朝吳時來詩云覓路天邊步尋僧雲裏逢

觀音巖 縣西南二十里 **麻姑巖** 縣東三十五里麻姑訪王方平蔡經于此

萬歷仙居縣志

卷二

二

仙居叢書

濡巖洞 縣西南三十里相傳其洞有龍禱雨輒應

括蒼洞 縣南三十里旁有禮斗壇道書第十洞天吳詠詩云桃源花漲門前水石壁雲流洞口風

湯公洞 縣北三里涵虛清敞光景互換一邑勝觀 **北塿** 縣西北三十里

竹家寮 縣北五十里地介三邑

永安溪 縣西二百十里大小二源小源出馮師山東流百里至曹村淺不可舟自曹村而下廣二十步勝小艇又東至妃姑與大源會廣一十步又東六十七里而南勝二十石舟

曹溪 縣西九十里源出括蒼嶺南流四十里入大溪嶺上有潭曰曹潭宋淳熙間縣令蘇光廷禱雨有物蜿蜒而出一黑一黃以壑承之躍而入迎止於潭下翌日大雨先是光廷夢有黃姓者手

二小龍而至及是符其夢遂初堂以祀

樛溪 縣西二十里源出處婺溫三州旋至蓼溪入大溪孟大武詩云樛斧砍雲春谷暗漁榔敲月夜溪寒

杜蜀溪 縣南二十里蜀王廟前頗幽險俗名杜濁 **彭溪** 縣東二十里源出天台南流三百十里入大溪

蓼溪 縣西三十里源出永嘉杉 縣南二十九里源出永嘉

白水溪 縣東二里源出天台竹 縣東五十八里源出天台

馬嶺溪 縣西北六十里源出東 縣西七十里源出東陽

土瀆溪 縣西八十里源出紫巖
山北流五十里入大溪

石井溪 縣西二十里源出東陽南
流一百二十里入大溪

朱溪 縣西一百六里一名木溪源出括蒼
嶺南流四十里入瞿溪十里入大溪

嵒裏溪 縣西一百六里源出括蒼
嶺南流三十里入大溪

左溪 縣西一百七十里源出永嘉
杉嶺北流四十里入大溪

眞溪 縣西一百七十四里源出馮
師山東流四十三里入大溪

方溪 縣西一百七十八里源出永
嘉北流一百三十里入大溪

慈溪 縣西一百八十里源出括
蒼嶺南流四十里入大溪

石牛溪 縣東十五里
中有石如牛

任家溪 縣北西五里
唐任昉居此

張阜潭 縣西北四十五里深峻處有石潭垂崖飛瀑林木森然後崖石摧隨復于山顛湧一沙潭龍
從於此乞水者自石潭以次而升夜憩潭側旦則迎水而去每潮漲則沙潭之水湧溢潮退
平復

柘溪潭 縣西北六十里其水
隨潮盈縮乾則有雨

復

孟溪山潭 縣北二十里曰老公潭二十五里曰山王潭三十五里曰孟椀潭三十里曰桂坑潭馬
漣潭禱雨輒應陳襄報雨詩二十韻有靈泉汲坎宮仙仗下嶙峋雷斧潛噴樹天波忽
漣塵

彭溪潭 縣北四十里支派疏
爲四堰溉田甚衆

天井潭 縣西南二十五
里禱雨立應

之句

三井潭 縣北三十里窈深叵測時發光怪宋陳
襄報雨詩云蘋蘩朝薦廟風雨夜離山

西罨 縣西南
五十里

萬歷仙居縣志

卷二

三

仙居叢書

馬鞍山潭 縣東六
十里

左溪右溪潭 縣西南九十
里韋羌深處

蒼山潭 縣西南
一百里

九峯潭 縣南八
十五里

深澄湖 縣東十五里相傳宋時有漁于此者巨魚長可二三
丈以物撻之獲一鱗如杯自是出入不常蓋龍宅云

相湖 縣東十五里四時不涸嘗于網中得石刻相湖二字
有題於湖上者半簾修竹翠含雨一鑑澄湖冷浸秋

磬湖 縣東二十五里相傳常
有磬浮水上光采奪目

黃赤湖 縣東南二十里修廣皆數丈水四時如沸夏飲寒
浸毛骨冬飲則如湯相傳宋時嘗有龍出沒云

小西湖 縣西二十里宋吳芾所
勑延袤數里旁有亭館

烈女湖 縣東三十五里舊名坐口湖顧氏女死難於此改今名國朝秦鳴雷詩云
自從惜寶捐軀後坐口湖更烈女湖大節直同天地老芳名不共海田枯

千頭湖 縣南二十五里唐有盧姓者
手及黃巢賊黨千級投湖中

七井 一在縣前一在學前一在縣東巷一在縣
南巷一在官倉巷一在市橋巷一在縣西

葛井 縣西北四十五里相
傳葛玄煉丹于此

蔡經井 縣東十七里舊傳井有九汲其
一則八皆波動兵燹後存其五

瑤崩瀑 縣西五十里玉几山北出源頂羽山流爲二潭潭之下巖三面壁
立瀑緣壁而下或雨初霽則飛流濺沫廣至十丈餘蓋奇觀也

僊洞瀑

縣西九十里如銀河飛灑四時不斷

西巖瀑

縣西四十五里

清水塘

縣西二十七里修廣淵深足以濟旱一方賴之

南溪塘

縣西南十五里宋鄭雄飛所鑿二塘相連冬夏不竭

朱公塘

縣北五里文公所鑿以制火患

下角塘

縣東三十里周圍里許

昊天泉

縣南三里廣五十步

離泉

縣南二里

葉亭泉

縣西北二里

紫泉

縣北二里

張阜堰

溪上堰

孟溪石藤堰

上礮堰

了溪堰

以上俱昇平鄉

彭溪坑堰

厚奢堰

以上俱慶雲鄉

圳口感德堰

王潘道堰

祝塿堰

赭光堰

北山秋成堰

高遷雷垣堰

赤城巖湖堰

萬歷仙居縣志

卷二

四

仙居叢書

蓼溪新堰

潘溪堰

張支湖堰

以上俱開元鄉

深裊堰

才塘堰

洋前堰

柵岸砂溪堰

板橋吳橫堰

湖村陳道堰

以上俱清風鄉

湯歸堰

歸仁鄉

上畝堰

未舟後洋堰

橫溪堰

重渠堰

以上俱遂甯鄉

風俗

俗之善敗民爲之也而君子之德司其風雖然當其俗之既成而欲破久據之壘而更方新之轍爲之風者戛戛乎其難矣夫善人教民百年而後可以勝殘去殺今之有司遠者五六年上復以文法從事掣其肘而摯其足卽欲化民成俗豈可得哉仙居當漢晉時僻處荒服風氣未開至宋令陳襄訓以詩書民始釋裋解耒

興於文物士多負氣抱節不爲羶趨富貴歸故鄉者絕跡公府愚民悶然耕食鑿飲其俗之善如此顧山居野處之性簡嗇不知禮節惜嫁女之費生輒溺之卜營宅兆遠至數十年不埋其親於慈孝之義謂何男子娶婦羣聚肆謔謂之打郎女子一爲媵則終身不獲配此二事尤可怪也習俗移人賢者不免况愚民耶夫禁之勢逆化之勢順吏卽能禁更歲月將復然矣史稱王烈居鄉爭訟屏息涵濡倡率所望於良縉紳焉

元旦拜天地謁祖祠親友鄉鄰交相展賀元夕張燈放炮神社設醮祈年清明祭墓插柳端午食角粽飲菖蒲酒中元祀先中秋賞月重陽登高賞菊飲茱萸酒冬至祭祖拜冬除夕守歲前數日掃宇舍各備肴果以爲獻春之需此一歲之大略也

戶口

周禮大司徒獻民數於王王拜受之以厚下安宅也仙之戶口視高皇帝臨御時

萬歷仙居縣志

卷一

五

仙居叢書

不啻減半矣夫以二百年休養安集而凋敝愈甚何也夫亦島夷肆侵役築之後賦斂煩脂力竭歟自行條鞭法民稍稍有起色而百孔千瘡療之匪易劑救生聚之方不能不望於司國計者

宋嘉定間額數

主戶二萬七千九百一十

人丁及幼丁廢疾五萬七千七百六十四

客戶一萬八百五十

人丁及幼丁廢疾一萬三千一百三十一

元至正間

南北諸色戶二萬七千一百八十一

國朝洪武二十四年

戶二萬七千三十五

口九萬三千八百八十

永樂十年

戶二萬一千九百五十五

口五萬八千四十六

宏治五年

戶一萬一十三

口男婦共三萬四十五

萬歷九年

戶一萬一十一

口與宏治五年同

萬歷仙居縣志

卷二

六

仙居叢書

萬歷仙居縣志卷之二